

## Jetzt gehder fort!

Letzt Woch hadde merrs von unserm Beiemooster Krebs.

Josses naa, sacht de Schorsch, der hätt joo aach noch e bisje bei uns bleiwe kenne, mir hadde uns grad onnen gewehnt.

No ja, sacht de Karl, der will halt weiderkumme. Unn so enn Londrat hott joo aach enn scheene Posde. Der werrd dauernd oigelade, hott enn Chauffeur unn kann alle paar Woche in Urlaub fahrn. Gell, Honnes?

Ich habb mette Achsele gezuckt. Mooch soi. Awwer enn Londrat hott aach vill Arweit unn vill Ärjer, weil inn so emm Londkreis wolle halt vill Leit mettbabbele.

Frächt de Schorsch: Moond ihr, der kennt sich dorchsetze doo owwe im Taunus? Doo wohne doch vill reiche Leit, die hawwe nit nor Geld, die hawwe aach ihr eichene Köpp, weilse moone sie wärn die Größte unn wisste alles besser.

Doo muss der Ulrich Krebs halt dorch, hott de Karl gesacht, er hott sich joo um den Posde gerisse.

No gut, sach ich, mir werrns in de Zeidung lese wies emm dort owwe geht, er will joo in Wicker wohne bleiwe.

In Wicker, wieso in Wicker, frächt de Karl, wohnt der in Wicker?

Ich habb genickt. Ei ja, der hott doch dort in de Näh von de Wingert e Haus gebaut.

So?, sacht de Karl, awwer doo musser joo jeden Daach von Wicker nooch Bad Homburg fahrn?

De Schorsch grinst. Dess iss joo nit dess Schlimmsde. Die hohe Spritpreise mache dem nix aus, der kriecht als Londrat joo e Audo gestellt, awwer wenn der in Wicker wohne bleibt, oh je!

Ich wusst nit was de Schorsch wollt. No was iss, Schorsch, wenn de Ulrich Krebs in Wicker wohne bleibt? Warum oh je?

De Schorsch grinst noch mehr. Doo musser in mindesdens drei Vereine geh, sunnst dun die Wickerer ihn nit akzepdiern. Unn ich waaß nit ob der singe kann, unn aach im Schützeverein wär der nit gut uffgehowwe.

Aach de Karl wusst nit wassde Schorsch wollt. Ei Schorsch, warum dann wär de Londrat im Schützeverein nit gut uffgehowwe?

Sacht de Schorsch: Der det doch dort erst was treffe, wenn die Mitt von de Scheib nit schwarz, sonnern rot odder grün wär.